



Komunikadu Imprensa
Tribunál Distritál Dili
10 Abril 2017

**JSMP husu ba Tribunál atu inkorpora indemnizasaun sivil iha pena prizaun
ba kondenadu sira iha kazu krime ho natureza violasaun seksuál sira**

JSMP kontinua husu ba Tribunál sira atu aplika indemnizasaun sivil aleinde pena prizaun ba arguidu ne'ebé prátika krime ho natureza violénsia seksuál. Indemnizasaun ne'e nu'udar meu ida atu asegura rekuperasaun kompletu ba prejuizu/danu moral ne'ebé vítima sofre hosi arguidu.

Tuir Artigu 104(1) Kódigu Penál, Tribunál tenke determina indemnizasaun sivil ba prejuizu ka estragus ne'ebé rezulta hosi krime ida, ho pedidu ne'ebé mai hosi vítima ne'ebé representa hosi Ministériu Públiku. Tribunál tenke determina total indemnizasaun ne'ebé atu fó ba vítima, bazeia ba asesmentu hosi total ba prejuizu ka estragus ne'ebé kauza hosi arguidu ninia aktu kriminál.

Iha parte seluk, artigu 72(3) hosi Kódigu Prosesu Penál, defini katak indemnizasaun ne'e responsabilidade hosi Ministériu Públiku atu inklui iha akuzasaun ba elementus ne'ebé rekere hodi determina responsabilidade sivil ba krime ida. Tanba ida-ne'e Ministériu Públiku ninia dever hodi define kauza hosi arguidu nia aktu ba prejuizu no estragus ba vítima, no fó evidénsia no valor hosi prejuizu ka estragus refere. Tuir artigu 278(8) (g), konsidera faktus hotu provadu, tribunál tenke deside 'se pre-rekeztus kona-ba arbitrasaun ba indemnizasaun sivil identifika ona'.

JSMP observa katak Tribunál sira kontinua lori autór ne'ebé provadu komete krime ho natureza violénsia seksuál ba iha prizaun nu'udar progresu importante ida. Mesmu nune'e, iha maioria kazu sira ne'e, Tribunál kontinua falla atu husu mós ba arguidu atu selu indemnizasaun sivil ba lezada. Hanesan mós iha kazu abuzu seksuál ba menór ne'ebé envolve arguidu DM hasoru lezada ne'ebé sei iha idade tinan 14, ne'ebé akontese iha Ermera, Tribunál Distritál Dili kondena arguidu uniku ho pena prizaun tinan 14.

“Indemnizasaun sivil ne'e importante tebes ba lezada sira, atu hadia fali prejuizu ne'ebé mosu hosi arguidu sira nia hahalok no nu'udar meu ida atu hanorin arguidu no sosiedade hakribi hahalok violénsia seksuál,” dehan Luis de Oliveira Sampaio, Diretór Ezekutivu JSMP.

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275
Telefone: 3323883 | 77295795

www.jsmp.tl

info@jsmp.minihub.org

Facebook: www.facebook.com/timorleste.jsmp

Twitter: @JSMPtl

Ministériu Públiku akuza katak iha 16 Maiu 2016, tuku 13:00 meudia arguidu ne'ebé nu'udar lezada nia profesor haruka lezada ho nia kolega sira muda komputador hosi salaun eskola foun ba sala eskola tuan, tanba arguidu atu fó ezame komputador no lezada mak arguidu bolu ikus liu. Iha salaun laran, arguidu haruka lezada tuur iha kadeira leten no hatoba tiha lezada no halo relasaun seksuál. Depoisde halo tiha relasaun seksuál arguidu ameasa sei baku lezada kuandu kesar ba nia inan-aman no nia kolega sira.

Iha 10 Setembru 2016, tuku 08.00 dader, arguidu kontinua halo relasaun seksuál ho lezada iha kadeira leten. Arguidu komete krime ne'e wainhira arguidu haruka lezada lori livru matematika ba iha arguidu nia eskritóriu foun. Arguidu mós ameasa lezada atu la bele fó hatene ba ema no haruka lezada fila ba nia uma.

Tuir-mai, iha 27 Setembru 2016, tuku 10.30, iha tempu rekereu, arguidu haruka lezada distribui materia *estudu do meio* ba iha kolega sira nia meja leten. Wainhira halo hela distribuisaun, arguidu bolu tan lezada ba iha arguidu nia sala no kaer lezada nia orgaun seksuál. Iha momentu arguidu halo hela asaun ne'e, lezada nia kolega na'in 3 hare no informa kedas ba profesora sira.

Ministériu Públiku akuza arguidu kontra artigu 177 (1) no (2) Kódigu Penál kona-ba abuzu seksuál ba menór ho meu koitu vajinál, anál no oral inklui prátika aktu seksuál relevante hasoru lezada ne'ebé seidak tinan 14.

Depois avalia prosesu no evidénsia relevante sira hosi kazu ne'e, Tribunál kondena arguidu ho pena prizaun 14. Pena ne'e akumulá husi pena prizaun tinan 8 ba akontesementu primeiru no segundu no pena tinan 6 ba akontesementu terseiru.

JSMP preukupa ho arguidu ne'ebé nu'udar profresor ida tuir loloos hatudu ezemplu no sai mahon ba nia alunus sira la'os viola fali nia nia aluna. Tanba ne'e, JSMP rekomenda ba Ministériu Edukasaun atu fó atensaun makaas ba profesor sira atu hala'o sira nia knaar ho loloos nu'udar edukador.

Atu hatene informasaun liutan bele kontaktu:

Luis de Oliveira Sampaio
Diretór Ezekutivu JSMP
Direasaun e-mail : luis@jsmp.tl